

Uunga siunnersuut: Akiliisarfik Ilangaassivik pillugu Inatsisartut inatsisaat nr. xx, xx, xx 2019-imeersaq.

Kapitali 1

Atuuffia nassuiaatillu

§ 1. Inatsisartut inatsisaanni matumani atuutilersinneqarput:

- 1) Pisortanit aamma sulisitsisunit ilaalu ilanngullugit innuttaasunut tunniussinernik passussinissamut nuna tamakkerlugu periaasissaq.
- 2) Pisortanit il.il. akiligassiissutit aalajangersimasut, innuttaasunut pisortanut akilinngitsuukkanik akiitsulinnut il.il. pisussaaffigineqartumik aammalu allanut nammineq kajumissutsimik, akilersinnissaannut ingerlaannartumik akiliisarfik.

§ 2. Inatsimmi matumani makkua imatut paasineqarput:

- 1) Ilangaassivik: Periaaseq innuttaasut isertitaannik il.il. akiliiviususaaq aammalu innuttaasunik aalajangersimasunik, isertitat il.il. tiguisussamut tunniunneqannginneranni, pisortanit akiligassiissutinik akiliisitsisartuq.
- 2) Ilangaassivik-nittartagaq: IT atorlugu iserfissiaq ataaseq arlallilluunniit, innuttaasut, akiligassiisut allallu isertitat, akileeqqusissutitik, akiliutitik nuussimasatik aamma akiligassiissutit pillugit paasissutissat takusinnaallugit.
- 3) Akiligassiisoq: Oqartussaasoq il.il., innuttaasumit aningaasanik akiliisitsinissamut Ilangaassivimmik atuisinnaasoq.
- 4) Akiliisussaatitaasoq: Sulisitsisoq, pisortani oqartussaasoq imaluunniit illuatungiusoq alla, aningaasanik § 4-mi, § 5-imi imaluunniit § 4, imm. 3 naapertorlugu tamatumunnga maleruagassat aalajangersagaasuni pineqartunut ilaatinneqalersunik, tunniussisoq.
- 5) Akiligassiissut: Aningaasat piumasaqaatigineqartut.
- 6) Akileeqqusissut: Akiliilluni nuussinissaq pillugu akiligassiisumit Ilangaassivimmut ilitersuissut.
- 7) Akiliilluni nuussineq: Iliuuseq, akiliinissaq, nuussinissaq imaluunniit aningaasanik tiguisinissaq siunertaralugu, akiliisup aamma akiligassiisup akornanni taassuma ataani pisussaaffiusimasinnaasut eqqarsaatiginagit, akiliisumit imaluunniit akiligassiisumit aallartinneqartoq.
- 8) Ulloq akiligassanngorfia: Akileeqqusissutip matussusernissaanut aningaasat tiguneqarnissaannut siusinnerpaamik ullussarititaasoq.
- 9) Ulluinnaq: Ulloq arfininngornerunngitsoq, sapaataanngitsoq imaluunniit nalliutunngitsoq.

Kapitali 2

Tunniussinerit akiliinerillu

§ 3. Innuttaasunut Qitiusumi Inunnut nalunaarsuiffik pillugu peqqussut naapertorlugu inuup normulerneqarsimasunut aammalu Kalaallit Nunaanni najugaqartutut nalunaarsorsimasunut, isertitat ilaalu ilanngullugit §§ 4-mi aamma 5-imi pineqartut Ilangaassivik aqputigalugu tunniunneqartassapput, taamaattorli takuuk imm. 2.

Imm. 2. Taanna innuttaasunut 18-it inorlugit ukiulinnut atuutinngilaq,

- 1) inatsisit naapertorlugit aningaaserivimmi kontumik innersuussinissamut pisussaaffeqanngitsunut, imaluunniit
- 2) pisortanit tunniussassanik § 5-imi pineqartunik tiguisanngitsunut.

§ 4. Innuttaasut suliffeqarfiillu innuttaasunut akiliinerit § 3-mi pineqartunut ilaasut makkua Ilangaassivimmut akilertassavaat:

- 1) Aningaasarsiat imaluunniit akileraarutit A-t, soraarnerussutisiassanut akiliutit allallu piffissami sulinermut tunngasut akiligassat ilanngaatigereerlugit aningaasanngorlugit aningaasarsiat allat assigisaat, ilanngullugit nerisaqarnermut ineqarnermullu, sulisut peqatigiiffiannut akiliut.
- 2) Ilinniagaqarnerutit, ilinniagaqarnerup il.il. nalaani meeqqanut tapit assigisaalluunniit, Nunatta Karsianit kommuninilluunniit akilernerqarsimasut.
- 3) Aktiaatileqatigiiffimmit, piginneqatigiilluni ingerlatseqatigiiffimmit imaluunniit piginneqatigiiffimmit il.il., Kalaallit Nunaanni angerlarsimaffeqartutut nalunaarsorsimasumit, iluanaarutit.
- 4) Siulersuisunut, ataatsimiititalianut, isumalioqatigiissitanut, siunnersuisooqatigiinnut assigisaannulluunniit, Kalaallit Nunaanni angerlarsimaffeqartunut, ilaasortaanermut imaluunniit ikiortaanermut, ajunngitsorsiasat.
- 5) Soraarnerussutisiaqarnissamut aningaasaateqarfinit imaluunniit inuunermut soraarnerussutisianullu sillimmasiisarfinnit soraarnerussutisiat aamma aningaasat tunniunneqartut il.il.
- 6) Aalisarnermut, piniarnermut aallaaniarnermillu tunisassianut tunngatillugu tunisat aningaasartaat.
- 7) Aningaasarsiat il.il., aningaasarsianit akileraarutit pillugit Inatsisartut inatsisaanni § 75, imm. 2 nr. 1 naapertorlugu isertitatut A-tut naatsorsuutigineqartut.

Imm. 2. Isertitat imm. 1-imi imaluunniit maleruagassat imm. 3 naapertorlugu aalajangersarneqartut pineqartunut ilaanersut, aammalu akiliisussaataaasup Ilangaassivik aqputigalugu aningaasartanik akiliinissaa peqqusissutigineqassanersoq, nalornisoqartillugu Akileraartarnermut ingerlatsiviup aalajangiiffigisinnaavaa.

Imm. 3. Isertitat suut aammalu tunniunneqartut suussusaat, Ilangaassivik aqputigalugu innersuunneqartartussat pillugit maleruagassanik erseqqinnerusunik Naalakkersuisut aalajangersaasinnaapput. Naalakkersuisut tamatuma saniatigut, sulisitsisut, soraarnerussutisiaqarnissamut aningaasaateqarfiit, inuunermut soraarnerussutisianullu sillimmasiisarfiit, nunanit allaneersut, ilanngullugit danskit aamma Savalimmiormiut, nunani imm. 1, nr. 1 aamma nr. 5 malillugu isertitat Ilangaassivimmut akilissanngikkaat, pillugu maleruagassanik aalajangersaasinnaapput.

§ 5. Namminersorlutik Oqartussat, kommunit kiisalu immikkoortortasut aamma sullissiviit, ilanngullugit suliffeqarfiit imminnut ingerlattut, pisut § 4-mi taaneqartut saniatigut tunniunneqartussat allat tamaasa innuttaasunut § 3-mi pineqartunut ilaasunut tunniuttassavaat.

Imm. 2. Suliffeqarfinnit, peqatigiiffinnit, aningaasaateqarfinnit innuttaasunut tunniunneqartussat Ilangaassivik aqutigalugu tunniunneqartassasut Naalakkersuisut aalajangersinnaavaat, suliaqarfiup il.il.:

- 1) ingerlatsinera imaluunniit naatsorsuutini amigartoorutai kommuninit imaluunniit Namminersorlutik Oqartussanit tapiissutininit imaluunniit inatsisit naapertorlugit tapersiinerit, akitsuutininit imaluunniit allatut isertitanit matussuserneqartarpata, imaluunniit
- 2) aningaasaatinut akiliutit il.il., suliffeqarfiup il.il. ingerlatsineranut annertuumik pingaaruteqarsimappat, aningaasaatinut akiliutinik, tapiissutinik, taarsigassarsiarititanik, qularnaveeqqutinik imaluunniit kommuninit Namminersorlutik Oqartussanit imaluunniit sullissivimmit il.il. imm. 1-imi pineqartunut ilaasumit allatut tapersiissutinik pissarsisarpat.

§ 6. Tunniussisussaataasut tunniussinerit § 4-mi aamma § taaneqartut, innuttaasup tunniunneqartussat tigusussanngornissaannut kingusinnerpaamik ullunnaat 2-innanngorneranni Ilangaassivimmut nuussavaat, kiisalu paasissutissat pisariaqartut tamaasa nalunaarutigisassallugit, takuuk § 7.

§ 7. Ilangaassivimmut akiliinerit tamarmik innuttaasup CPR-normuanut atatinneqassapput.

Imm. 2. Akiliinerit aamma akiliinerup suussusaa, kiisalu akiliineq sumut tunggassuteqarnerisooq pillugit paasissutissanik, akileraartarnermut ingerlatsiviup aalajangersagaannik, imaqassapput.

§ 8. Akiliutaasooq, imaluunniit akiliutaasup ilaa akileeqqusissummik akiliinermut atorneqaqqusaanngitsoq, akiliisussaataasut akiliinerminni allassinnaavaat, makkuninnga pisoqarnerani:

- 1) Ullormusiassanik aamma angalanermi ajunngitsorsiasanik, ilanngullugit taakkua pillugit siumornerit, akiliinermi.
- 2) Aningaasartanik akiliigallarnermut assigisaannullu ataatillugu innuttaasumut utertillugit akilerneqartussanik akiliinermi.

Imm. 2. Akiliinernik allanik imm. 1-imi taaneqartunit allaanerusunik taasinissamut akiliisussaataasup periarfissaqarneranut maleruagassanik Naalakkersuisut aalajangersaasinnaapput.

Akiliisarfimmu ilaatinneqartut

§ 9. Aatsaat Inatsisartut inatsisaanni matumani aalajangersakkat malillugit akiligassiissutit akilersinneqarsinnaapput:

- 1) innuttaasooq Ilangaassivimmut ilanngunniarluni nalunaarsimappat, imaluunniit
- 2) akileraartarnermut ingerlatsivik imm. 2 malillugu aalajangiisimappat.

Imm. 2. Tunngavissarititaasut matuma kinguliani allassimasut ilaat ataaseq naammassineqarsimappat, innuttaasoq akiligassanik akiliisitsisarnermi pineqartunut ilaalissasoq, Akileraartarnermut ingerlatsivik aalajangiisinnaavoq:

- 1) Innuttaasoq pisortanut il.il. akiitsoqarpoq.
- 2) Innuttaasoq ukiut 5-it kingulliit iluanni minnerpaamik 3-nik akiligassinneqarsimappat, tassani akiligassiisup akiligassiisut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaat malillugu akileraartarnermut ingerlatsivimmi akilersinniarnissaannut tunniussimallugu.

Imm. 3. Imm. 2 malillugu aalajangiinninnermi, akileraartarnermut ingerlatsiviup innuttaasoq, minnerpaamik sapaatit akunnerinik 3-nik piffissaliilluni, aalajangiinissamut eqqarsaatigineqartumut akerliliissuteqarnissamut periarfississavaa. Akileraartarnermut ingerlatsivik akerliliissummik tigusaqarsimanngippat, innuttaasoq piffissamut killiliussap erseqqinnerusumik oqaatigineqartup iluani, akiliisitsisarnermi pineqartunut ilaatinneqalissaaq. Piumasaqaateqarnerup atuunnerannut akerliliissuteqarnerit innuttaasup tungaaniit uppersarsarneqarpata, akerliliissuteqarnerit kinguartitsinermik sunniuteqassapput.

Imm. 4. Innuttaasup akiitsut piffissamut killiliussap imm. 3-mi taaneqartup naannginnerani akilerpagit, innuttaasoq imm. 2, nr. 1 malillugu akiitsunik akilinngitsuugaqanngitsutut isigineqassaaq.

Imm. 5. Innuttaasup akiliisitsisarfimmi pineqartunut ilaasoq, akileraartarnermut ingerlatsivimmut qinnuteqarluni akiligassanik akilersitsisarnerit nalunaarsorsimajunnaarsissinnaavai:

- 1) innuttaasup qinnuteqarnerup nalaani imm. 2-mi tunngavissarititaasut naammassisimanngippagit,
- 2) piffissaq qinnuteqarfiusoq sioqqullugu kingusinnerpaamik ukiup ataatsip iluani imm. 2-imi tunngavissarititaasut naammassisimanngippagit, aamma
- 3) aalajangersakkami imm. 2 naapertorlugu pineqartoq akiliisitsisarfimmi pineqartunut ilaasoq, Akileraartarnermut ingerlatsivik ukiut kingulliit marluk iluanni aalajangiisimanngippat.

Imm. 6. Akileeqqusissutit ulloq suna aallarnerfigalugu Ilangaassivik aqutigalugu akilersinneqartalissanersut aamma akilersinneqartarunnaassanersut, Akileraartarnermut ingerlatsivik innuttaasumut aamma akiligassiisumut il.il. nalunaaruteqassaaq.

Imm. 7. Akileraartarnermut ingerlatsivik imm. 2 malillugu aalajangiinissaq siunertaralugu, akiitsunut akilinngitsuukkanut nalunaarsuiffiit il.il. ataatsimoortillugit ingerlatissavaat.

Imm. 8. Aalajangersagaq manna malillugu aalajangiinernut maleruagassanik Naalackersuisut aalajangersaasinnaapput, ilanngullugit naammagittaalliornissamut piffissamut killissaliussat aammalu imm. 5 malillugu qinnuteqaat elektroniskinnorlugu imaluunniit immersugassami aalajangersimasumi tunniunneqassasoq.

Akiligassiisutit ilanngutsinneqarsinnaasut

§ 10. Oqartussat sorliit Ilangaassivik aqutigalugu akiliisitsisassanersut, kiisalu akiligassiisutit qanoq ittut Ilangaassivik aqutigalugu akilersinneqartassanersut,

Naalakkersuisut kommuninut aamma pisortani akiligassiisunut isumaqatiginninniarlutik aalajangersaassapput, taamaattorli takuuk imm. 2.

Imm. 2. Ingerlatseqatigiiffiit matuma kinguliani allattorneqartut akiligassiisutit ilanngaassivik aqqutigalugu akilersinneqartussatut ilanngutissagaat pillugu maleruagassanik Naalakkersuisut aalajangersaasinnaapput:

- 1) INI A/S.
- 2) Iserit A/S.
- 3) Inissiatileqatigiiffiit attartortitsisartut tamakkiisumik ilaannakortumilluunniit pisortanit pigineqartut.

Kapitali 3

Akiliinerit aamma aningaasat atorsinnaasat

§ 11. Innuttaasut § 9, imm. 1-2 naapertorlugu akiliisarfimmi pineqartunut ilaasut, ilanngaassivimmit tunniussinnginnermi akileraarutit, akitsuutit aamma akiligassiinerit allat, ilanngaassivimmut ilanngutsinneqarsimasut akilersinneqassapput.

Aningaasat atorsinnaasat

§ 12. Inuk kisimiittoq qaammammut 4.000 koruuninik ikinnerusunik aningaasanik atorsinnaasanik tunniussivigineqarneranik kinguneqartumik, Inatsisartut inatsisaat manna malillugu aningaasanik akiliisitsisoqarsinnaanngilaq. Katissimallutik aappariinnut aningaasat atorsinnaasat katillugit qaammammut 6.000 koruuniupput.

Imm. 2. Innuttaasunut, ilinniagaqarnerisutit tigusisartunut, aningaasat atorsinnaasat qaammammut 2.500 koruuniupput, taamaattorli takuuk imm. 3-6.

Imm. 3. Meeqqanut angerlarsimaffimmi najugaqartunut ataasiakkaanut 18-it inorlugit ukiulinnut inoqutigiinniittunut tamarmiusunut aningaasat atorsinnaasat qaammammut 1.600 koruuninik qaffanneqassapput, taamaattorli takuuk § 13.

Imm. 4. Inuk innarluutilinnut tapinik assigisaannillu peqqissutsimut tunngatillugu ikiorsiissutinik tigusaqartartoq, tapit aningaasartaasa annertoqataannik aningaasat atorsinnaasat nalingannik qaffaavigineqassasoq, kommunalbestyrelsi aalajangiisinnaavoq.

Imm. 5. Kommunalbestyrelsi maleruagassat imm. 6 naapertorlugu Naalakkersuisunit aalajangersarneqartut malillugit atorsinnaasat aningaasartaasa allanngortinneqarnissaat pillugu aalajangiissaaq.

Imm. 6. Naalakkersuisut maleruagassanik erseqqinnerusunik aamma aningaasat atorsinnaasat annertussusissaannik aalajangersaasinnaapput, ilanngullugit nammineq ineqarnermut aningaasartuutit matusserneqarnissaannut aningaasat atorsinnaasat allanngortinneqarnerat. Taamaattorli Naalakkersuisut maleruagassanik, aningaasat atorsinnaasat imm. 1-3 malillugit annertussusissanit appasinnerulernerannik malitseqartumik, aalajangersaasinnaanngillat. Naalakkersuisut tamatuma saniatigut aningaasat atorsinnaasat naatsorsorneqartarnerat pillugu maleruagassanik aalajangersaasinnaapput.

§ 13. Aningaasat atorsinnaasat qaffanneqartut § 12, imm. 3-mi taaneqartut angajoqqaatut oqartussaasumut, taakkua meeqqap najugaqarfigisaani nalunaarsorsimappata, taakkununga tutsinneqassapput. Angajoqqaatut oqartussaasut marluullutik meeraq najugaqatigippasuk, aningaasat atorsinnaasat qaffanneqartut angajoqqaanut tamarmiusunut immikkut 50 procentimik agguarneqassapput. Angajoqqaatut oqartussaasup aappaata meeraq najugaqatiginngippagu, aningaasat atorsinnaasat qaffanneqartut angajoqqaatut oqartussaasumut, meeqqap najugaqatigisaanut, tutsinneqassapput.

Imm. 2. Oqartussanit meeraq paaqqtarineqartussatut inissinneqarsimappat, aningaasat atorsinnaasat qaffanneqartut meeqqamik paaqqtarinittumut imaluunniit paaqqtarinittunut, tutsinneqassapput.

Imm. 3. Meeraq ulloq unnuarlu paaqqinniffimmi inissinneqarsimappat, aningaasat atorsinnaasat qaffanneqartut atorunnaassapput.

Imm. 4. Aningaasat atorsinnaasat qaffanneqartut tamakkerlutik imaluunniit ilaat angajoqqaap aappaanut agguarneqassasut, angajoqqaap aappaata akileraartarnermut ingerlatsivimmu qinnuteqatigisinaavaa. Qinnuteqaat akileraartarnermut ingerlatsiviup innersuussutigisaatut ingerlanneqassaaq.

§ 14. Aningaasat atorsinnaasani tamakkerlugit imaluunniit ilai angajoqqaap aappaanut nuutinneqassasut, angajoqqaap aappaata akileraartarnermut ingerlatsivimmu qinnuteqaatigisinaavaa. Qinnuteqaat akileraartarnermut ingerlatsiviup innersuussutigisaatut ingerlanneqassaaq.

§ 15. § 12, imm. 1-3-mi aningaasat atorsinnaasat, ukiut tamaasa januaarip aallaqqaataani procenti aaqqiissutissaq Procenti aaqqiissutissaq pillugu Inatsisartut inatsisaat malillugu Naatsorsueqqissaartarfimmit naatsorsorneqartoq tunngavigalugu iluarsineqartassapput.

§ 16. Ataasiakkaat aningaasaqarnikkut pisariaqartitsinerisa imaluunniit inissisimanerisa immikkut eqqarsaatigineqarnissaat pisariaqarpat, pisortanit ikiorsiissutinik imaluunniit soraarnerussutisianut tapimik tunniussineq ingerlaannaq tunniunneqartussatut tunniunneqassasoq kommunalbestyrelsi aalajangersinnaavoq. Ingerlaannaq tunniussineq Ilangaassivik aqutugalugu pissaaq, kisianni akileeqqusissutit akiligassangoreersut akilerneqarnissaanut aningaasanik unitsitsisoqassanani.

Imm. 2. Nerisaqarnerisutit il.il. tunniussineq ingerlaannaq tunniussinertut pisinnaasoq, peqqissutisimut suliassaqarfik aalajangiisinaavoq.

Imm. 3. Imm. 1-2 malillugu ingerlaannaq tunniussinertut, tunniussinerup pisinnaanissaanut mianerisassat suut tunngavilersuutigineqarsinnaanersut pillugu maleruagassanik erseqqinnerusunik Naalakkersuisut aalajangersaasinaapput.

§ 17. Innuttaasoq kommunimit aningaasaqarnikkut aquunneqartussangortinneqarsimappat, Ilaangaassivimmit tunniussinerit aningaaserivimmi kontumut kommunip innersuussutaanut ingerlatinneqarsinnaapput.

Imm. 2. Kommunalbestyrelsi imm. 1-imi taaneqartunik pisoqartillugu paasisutissanik pineqartoq pillugu Ilangassivimmi nalunaarsorneqarsimasunik tamaginnik pissarsisinnaavoq.

Kapitali 4

Nalunaarneq, akiliisarneq aamma peerneqartarnera

§ 18. Pisassat akileeqqusissuteqarluni Ilangaassivimmut nalunaarutigineqassapput.

Imm. 2. Akileeqqusissutit ulluinnarmi Ilangaassiviup akileeqqusissummik tigusiffiani, tiguneqartutut isigineqassapput. Akileeqqusissutit arfininngornermi, sapaammi imaluunniit nalliuttuni tiguneqartut, ulluinnarmi tullermi qaninnerpaami tiguneqartutut isigineqassapput.

Imm. 3. Akileeqqusissut, akileeqqusissutip tiguneqarnerata kingorna qaammatisiutit malillugit ullut 10-t qaangiunneranni akiligassanngusaaq.

§ 19. Akileeqqusissut ullup akiligassanngorfiata kingorna kingusinnerpaamik qaammatit 3-ata naanerani Ilangaassivimmit peerneqassaaq, taamaattorli takuuk imm. 3.

Imm. 2. Ulloq piffissaq eqqorlugu akiliiffissaq kingulleq tassaavoq qaammatip imm. 1-imi taaneqartup naanerani ulluinnaq kingulleq.

Imm. 3. Akileeqqusissutit makkua ullup akiligassanngornerisa kingorna qaammatisiutit malillugit ullut 30-t qaangiunneranni peerneqassapput:

- 1) Innuttaasunut inuussutissarsiornermik ingerlataqartunut innaallagissamik, imermik kiassarnermillu pilersuineq pillugu akileeqqusissut.
- 2) Nunaminertanik inuussutissarsiornermut atugassatut aattartortitsineq pillugu akileeqqusissut.
- 3) Inuussutissarsiornermit eqqagassanik eqqaaneq pillugu akileeqqusissut.

Imm. 4. Inuit akileeqqusissummik piffissaq eqqorlugu akiliisimanngitsut, akiliinissamut piffissaliussanit imm. 1-imi aamma imm. 3-mi allassimasunit sivikinnerusumik akiliinissamik piffissalerlugit akileraartarnermut ingerlatsiviup pisussaaffilersinnaavai. Aammattaq akileeqqusissutit imm. 3-mi pineqartunut ilaasut pineqartillugit akiliinissamut qularnaveeqquisiisoqassasoq, akileraartarnermut ingerlatsiviup piumasarisinnaavaa.

§ 20. Innuttaasup pisassarisat tamanna sioqqullugu akilersimappagit, akileeqqusissut akiligassiisup nalunaarutigisinnaanngilaa.

§ 21. Akileeqqusissut taamaallaat ilaannakortumik matussuserneqarpat, sinneruttoq kingusinnerusukkut akilersinneqartussatut uninngassaaq, taamaattorli takuuk § 19, imm. 1-4-mi piffissamut killissaliussat.

Akiitsullit arlallit

§ 22. Innuttaasut arlallit pisassarisanut ataatsinut akiliisussaappata, akiligassiisup akileeqqusissut innuttaasunut tamarmiusunut akiligassap ilaa akiliisussaaffiat allallugu Ilangaassivimmut ilanngutsissinnaavaa.

Imm. 2. Naalakkersuisut akiligassiisup akiligassiissutinik arlalinnik akiliisussaqaartunik akiliisitsinissamut Ilanngaassivimmik atuinissaa pillugu maleruagassanik aalajangersaasinnaapput, ilanngullugu akiliisussat tamarmik § 9 malillugu Ilanngaassivik aqqutigalugu akiligassanik akiliisitsisarnermi pineqartunut ilaatinngit, akiligassiissutit akilersinneqarnissaat.

Akileeqqusissutinut atugassarititaasut

§ 23. Akileeqqusissutinik ilanngutsitsilluni nalunaaruteqaarnermi akiligassiisup innuttaasut akiliisussaataasut CPR-normui allassavai.

Imm. 2. Akiligassiisup akileeqqusissutinik nassiussisarneranut, kiisalu paasissutissat suut akiligassiisup akiliisitsinissamut nalunaarutiginninnermini allasanerai, pillugit piunasaqaatinik erseqqinnerusunik Akileraartarnermut ingerlatsivik aalajangersaassapput.

Imm. 3. Akiligassiisut Ilanngaassivimmik atuinerannut aammalu akileeqqusissutit imarisassaannut suleriaasissat ilitersuissutillu erseqqinnerusut Akileraartarnermut ingerlatsiviup aalajangersassavai.

Imm. 4. Imm. 3 malillugu atugassarititaasuni allannguutit, atuutilernissaat sioqqullugu minnerpaamik qaammat ataaseq sioqqullugu ilimasaarutigineqassapput.

Kapitali 5

Akiliinerit tulleriinneri

§ 24. Akileeqqusissutit akiligassanngortut §§ 25-27-imi pingaarnersiuinermi tulleriinnilersuinissaq aalajangersarneqartoq malillugu assigiinngitsumik pingaarnersiuiffigineqarsimappata, akileeqqusissut pingaarnersiuinermi qaffasinnerutinneqartoq, akileeqqusissutinit pingaarnersiuinermi appasinnerutinneqartumit, siulliullugu akilersinneqassaaq.

Imm. 2. §§ 25-27 naapertorlugit akileeqqusissutit arlallit assigiimmik pingaarnersiuinermi inissisimatinneqartut akiligassanngorsimallutik uninngappata, kisianni § 19-imi killissaliussat qaangerneqarsimanatik, akileeqqusissut siulliulluni tiguneqartoq, akileeqqusissutinit kingusinnerusukkut tiguneqartunit, siulliullugu akilerneqassaaq.

§ 25. Allat tamaasa sioqqullugit akilerneqassapput:

1) aningaasarsianit akileraarutit pillugit Inatsisartut inatsisaat aamma akileraartarnermik ingerlatsineq pillugu Inatsisartut inatsisaat, naapertorlugit isertitanit akileraaruteqaataasussanit akileraarutaagallartut, ilanngullugit akileraarutinut tapissanut akiligassat ilanngunneqartut, takuuk akileraartarnermik ingerlatsineq pillugu Inatsisartut inatsisaanni § 13, imm. 8.

§ 26. Akileeqqusissutit § 25-mi pineqartut kingorna akileeqqusissutit tiguneqartut akiligassanngortullu imatut tulleriinnilersuineq malillugu akilerneqassapput:

1) Ineqarnermut akiliutit aamma ilinniartut inaannik attartornermut akiliutit akilerneqarnissaanik piunasaqaat.

- 2) Innaallagissamik, imermik kiassarnermillu pilersuinnermut akiliinissamik piomasaaqat.
- 3) Ulluunerani paaqqinnittarfimmi inissamik akiliinissamut piomasaaqat.
- 4) Inuussutissarsiutigalugu piniarnermut allagartap akilerneqarnissaanik piomasaaqat.
- 5) Eqqaavilerinnermut anartarfilerinnermullu akiliinissamik piomasaaqat.
- 6) Meeqqanut akilersuutit siumoortumik tunniunneqartut pillugit piomasaaqat.
- 7) Ilinniagaqarnersiutit pillugit Inatsisaat malillugu ilinniarnermi taarsigassarsiat utertillugit akilerneqarnissaat pillugu piomasaaqat.
- 8) Kommunitit sullissinnernut allanut akiliinissamik piomasaaqat.
- 9) Akileraarutinut akitsuutinullu piomasaaqatit allat, tassunga ilanngullugit akileraarutinut tapissanut akiligassat, akiliisitsissutinik, akiliutinik, eqqunngitsumik nammineerluni nalunaarsuisimanerup imaluunniit nalunaarsuisimannginnerup malitsigisaanik akileraartarnermut tapiliussanik akileeqqusissutinik piomasaaqat.
- 10) Namminersorlutik Oqartussanit, kommuninit taakkualu ataanni sullissivinnit piomasaaqatit allat, ilanngullugit suliffeqarfiit imminut ingerlatsitat.
- 11) Ineqarnermut akiliutip, pingaartumik pineqartup inuussutissarsiummik ingerlatsineranut tunngassuteqartup, akilerneqarnissaanut piomasaaqatit.
- 12) Innaallagissamik, imermik kiassarnermillu pilersuinnermut pingaartumik pineqartup inuussutissarsiummik ingerlatsineranut tunngassuteqartunut akiliinissamik piomasaaqatit.
- 13) Kommunip sullissinnerinut, pingaartumik pineqartup inuussutissarsiummik ingerlatsineranut tunngassuteqartunut, akiliinissamik piomasaaqatit allat, ilanngullugit akuersissutinut il.il. akiliutit.
- 14) Namminersorlutik Oqartussanit aamma taassuma ataanni sullissivinnit, pingaartumik pineqartup inuussutissarsiummik ingerlatsineranut tunngassuteqartunik, akiliinissamik piomasaaqateqarnerit allat.

Imm.2. Naalakkersuisut tulleriinnilersuinerup imm. 1-imi aalajangersarneqartup iluani, maleruagassanik erseqqinnerusunik tulleriinnilersuinnermut tapertaasinnaasunik, aalajangersaasinnaapput.

§ 27. Akileeqqusissutit § 26-mi pineqartunut ilaasut kingornatigut matuma kinguliani tulleriinnilersuineq malillugu akiliisoqassaaq:

- 1) Akiitsut naafferartumik akilersornissaat pillugu isumaqatigiissutit, qitiusumi akiliisitsiniarnermut oqartussaasunut isumaqatigiissutaasut.
- 2) Akiitut akilersornissaat pillugu nammineq kajumissutsimik isumaqatigiissutit akiligassiisunut isumaqatigiissutaasut.

Kapitali 6

Inuussutissarsiortunut namminersortunut maleruagassat immikkut ittut il.il.

§ 28. §§ 29-31 innuttaasunut atuutissasut akileraartarnermut ingerlatsivik aalajangersinnaavoq, Ilaangaassivimmi akileraartarnermut paasissutissat, aamma CPR-inut nalunaarsuiffimmit il.il. paasissutissat aallaavigalugit, akileraartarnermut ingerlatsivik naliliippat:

- 1) Innuttaasup isertitaasa annertunerpaartaat §§ 4-5-imi pineqartunut ilaanngitsut.
- 2) Innuttaasooq qaammatini pingasuni ataannartuni inatsimmi §§ 4-5-imi pineqartunut ilaasunik isertitaqarsimanngitsoq, aammalu innuttaasup qaammatini tulliuuttuni §§ 4-5-imi pineqartunut ilaasunik isertitaqarnissaa taamatuttaaq naatsorsuutigineqanngitsoq.
- 3) Innuttaasooq Kalaallit Nunaannit nuuttoq.

§ 29. Akileraartarnermut ingerlatsivik § 28 malillugu aalajangiisimappat, §§ 12-imi, 13-imi, 18-imi aamma 19-imi aalajangersakkat pineqartunut atuutissanngillat.

Imm. 2. Akileraartarnermut ingerlatsivik § 28 malillugu aalajangiisimappat, Ilangaassivik, akileraarutissat naatsorsorneqartut aammalu akileeqqusissutit tiguneqartut aallaavigalugit akiligassiisummik ataatsimoortumik qaammatit tamaasa nassiussisassaaq.

Imm. 3. Akiliinissamut piffissamut killiliusaaq qaammatsiutit malillugit ullunik 14-inik sivilissuseqarpoq aammalu ulloq Ilangaassiviup akiligassiisummik nassiussivia aallarnerfigalugu naatsorsorneqassalluni. Piffissamut killiliusaaq arfininngornermi, sapaammi imaluunniit nalliuuttumi naappat, piffissamut killiliussat ulluinnarmut tullermut sivitsorneqassaaq.

§ 30. §§ 25-27-imi aalajangersakkat taamaaqataanik § 27, imm. 1 malillugu akiliutinut, § 29 malillugu akiligassiinermi akilerneqartunut, atuutissapput.

§ 31. § 29-mi akiliinissamut piffissamut killiliussat qaangerneqarpata, akileeqqusissutit il.il. akilerneqanngitsut imaluunniit ilaannakortumik akilerneqartut, akiliisitsiniarfiusussanngussapput.

Kapitali 7

Ilangaassivimmit tunniussinerit aamma paasissutissanik pissarsisinnaaneq

§ 32. Aningaasat Ilangaassivik aqutigalugu tunniunneqartut, danskit, savalimmiormiut imaluunniit kalaallit aningaaserivianni aningaaserivimmi kontumut akiliisumit innersuunneqartumut, akilerneqassapput.

Imm. 2. Aningaasat aningaaserivimmi kontumut imm. 1-imi allassimasumut nuunneqareerpata, innuttaasup tigusinnaalissavai.

Imm. 3. Aningaasartani aningaaserivimmi Danmarkimi, Savalimmiuni imaluunniit Kalaallit Nunaanni angerlarsimaffeqartuunngitsumi kontumut innersuunneqartuni, aningaasartuutaanerusut nuussinerimut atatillugu aningaasartuutigineqartussat, ilanngaatigineqarsimasinnaapput. Nuussinerimut aningaasartuutit aningaasartanit innersuunneqartussanit annertuneruppata, akileraartarnermut ingerlatsiviup aningaasat kontumut innersuunneqartumut nuunngissinnaavai.

Imm. 4. Aningaaserivimmi Danmarkimi, Savalimmiuni imaluunniit Kalaallit Nunaanni angerlarsimaffeqartuunngitsumi kontumut akiliinerit, Kalaallit Nunaanni kontunut taamaaqataanik akiliinertut ulloq taanna suliarineqarpata aammalu taamaaqataanik Kalaallit Nunaanni akiliinerit piffissaaq eqqorlugi tiguisussamut annguppata, taamaaqataanik nunap

iluani akiliinernit kingusinnerusukkut tiguisissamut anngunneri apeqquaatinnagu, piffissaq eqqorlugu suliarineqartutut isigineqassapput.

§ 33. Innuttaasup Ilangaassiviup nittartagaa aqutigalugu sukkulluunniit akileeqqusissutitut innuttaasumut pineqartumut ilanngutsinneqarsimasunut takussutissiaq, takusinnaavaa.

Imm. 2. Innuttaasooq minnerpaamik qaammammumut ataasiarluni allakkatigit akileeqqusissutitut naatsorsukkanik tiguisinnaatitaavoq.

Imm. 3. Innuttaasooq Ilangaassivimmi paasissutissanik qanoq ililluni pissarsisassanersoq, kiisalu allakkatigit nassiusseqqinnermi tamatumunnga akiliisitsisoqartassanersoq, pillugit Naalackersuisut maleruagassanik erseqqinnerusunik aalajangersaasinnaavoq. Elektroniskimik nassiusseqqinneq akeqanngilaq.

Kapitali 8

Paasissutissanik aamma kisitsisitigit paasissutissanik paarlaasseqatigiinneq

§ 34. Akiligassiisooq innuttaasooq akuersiteqqaarnagu akiliutissap nuunneqarnerata piviusunngortinneqarnissaanut atugassatut Ilangaassivimmut paasissutissanik tunniussisinnaavoq. Paasissutissat inummut tunngassuteqarlutik mianernarsinnaapput.

Imm. 2. Kommunalbestyrelsi innuttaasooq akuersiteqqaarnagu, innuttaasunut isertitanik ikiorsiissutinillu tunniussinissamut atugassanik, ilanngullugit innuttaasut pillugit paasissutissat § 12, imm. 3-4 malillugu aningaasanut atorsinnaasanut qaffaavigineqarsimasut imaluunniit qaffaavigineqarsimannngitsut pillugit, kiisalu innuttaasut aningaasartuutimik aalajangersimasut akilernissaannut kommunimit ikiorserneqartartut pillugit, Ilangaassivimmut paasissutissanik ingerlatitseqqissinnaavoq, ilanngullugit paasissutissat inummut tunngasut.

Kisitsisitigit paasissutissat

§ 35. Ilangaassiviup kisitsisitigit paasissutissat Naalackersuisut qinnutigisaat, aammalu suliassaqarfanni immikkuullarissuni ineriartorneq pillugu paasissutissanik itisiliissutaasussanik pissarsiariniagaat, tunniutissavai.

Kapitali 9

Oqartussaasumut tunngasut

36. Akileraartarnermut ingerlatsiviup Inatsisartut inatsisaanni allaffissornikkut aqutsineq isumagissavaa.

Imm. 2. Akileeqqusissut, erseqqissumik eqqunngitsutut isikkoqartoq, ilanngullugit akileeqqusissutit kukkunillit imaluunniit teknikkikkut piumasaaqatinik naammassinninngitsut, Akileraartarnermut ingerlatsiviup tigujumannngissinnaavai. Akileraartarnermut ingerlatsiviup

pisariaqanngitsumik kinguarsaanani akileequisissutit tigujumaneqanngitsut pillugit akiligassiisoq nalunaarfigissavaa.

Imm. 3. Akileraartarnermut ingerlatsiviup akileequisissutit akiligassiisumit nassiunneqartut annertuumik imaluunniit uteqqittartumik kukkuneqartut imaluunniit amigaateqartut paasiguniuk, akileraartarnermut ingerlatsiviup Naalackersuisut, nakkutilliinermut oqartussap attuumassuteqartup aamma akiligassiisup ilisimatinneqarnerannut peqatigitillugu akiligassiisumit akileequisissut tigujumanagu aalajangersinnaavoq.

Imm. 4. Akiligassiisup pissutsit imm. 3 naapertorlugu aalajangiinerup malitsigisai iluarsippagit, akileraartarnermut ingerlatsiviup Ilangaassivik aqutugalugu innersuunneqartussatut akileequisissummik tiguisarnini aallarteqqissinnaavaa.

§ 37. Kommunit innuttaasunut Ilangaassiviup atorneqarnera pillugu siunnersuissapput ikiutissallutillu.

Imm. 2. Akileraartarnermut ingerlatsivik kommuninut ilitsersuinissamut najoqutassanik naleqquttunik atugassiissaaq.

§ 38. Naalackersuisut periaatsimut akisussaasussamik, akiliutinik tunniussinernillu aqutsinermik isumaginninnissamik, kiisalu akiliutissanik nuussinernik suliaqartussamik, toqqaassapput. Naalackersuisut Ilangaassiviup ingerlanneqarnera pillugu piffissamut ukiut 10-t angullugit isumaqatigiissuteqarnissamut piginnaatitaapput. Ingerlatsinermut isumaqatigiissummi Ilangaassivimmi teknikkikkut periaatsimik pissarsinissaq pineqartunut ilaasinnaavoq. Ingerlatsinermut isumaqatigiissummi aammattaaq innuttaasunik sullissineq aamma akiliutissanik nuussinerit piviusunngortinnissaat il.il. pineqartunut ilaasinnaapput.

Imm. 2. Periaatsimut akisussaasutut pisortani oqartussaasoq imaluunniit suliffeqarfik namminersortoq toqqarneqarsinnaapput.

Imm. 3. Periaatsimut akisussaasuusup akiliinernik nuussinerit il.il. naammassisinnaanissaat siunertaralugu, aammalu Ilangaassiviup ingerlaavartumik ingerlanneqarnerata isumagisinnaanissaanut, inuit normui suliarisinnaavai.

§ 39. Ilangaassivik akileraartarnermut ingerlatsiviup kukkunera imaluunniit sumiginnaanera pissutaalluni, Inatsisartut inatsisaanni pisussaaffiit naammassinninngippat imaluunniit pisussaaffimminik kingusissukkut imaluunniit amigartumik naammassinnippat, Namminersorlutik Oqartussat innuttaasumut taarsiinissamut akisussaasuupput, taamaattorli takukkit imm. 2 aamma 3.

Imm. 2. Pisoq akiliisussaataasup imaluunniit innuttaasup nipangiussineranik, iliuseqannginneranik, piaaraluni imaluunniit mianersuaalliorujussuarluni iliuseqarneranik pissuteqarpat, Namminersorlutik Oqartussat imm. 1 malillugu akisussaasuussanngillat.

Imm. 3. Akileraartarnermut ingerlatsiviup pissutsit pisumut pissutaasut sillimaffigisimasinnaasimanngippagit imaluunniit paasereersimasariaqarsimanngippagit aammalu pisut akiorniarsinnaasimanngippagit, imm. 1 apeqqutaatinnagu, soorlu nalunaarasuartaateqarnermi qamittoortoqarpat, IT-mi qamittoortoqarpat, innaallagissamik pilersuineq unittoorpat, suliumajunnaartoqarpat, sulisitsiumajunnaartoqarpat,

mattussisoqarpat imaluunniit pinngortitami ajunaarnersuaqarpat, kinguaattoornernut imaluunniit annaasaqarnernut, avataaniit pisunit pissuteqartunut, Namminersorlutik Oqartussat akisussaasuussanngillat.

§ 40. Akileraartarnermut ingerlatsivimmi sulisut Kalaallit Nunaanni pinerluttulerinermut inatsimmi §§ 50-53 malillugit akisussaatinneqarlutik, inuit imaluunniit pisinnaatitaallutillu pisussaataitaasut aningaasaqarnikkut, inuusutissarsiornikkut imaluunniit inuttut inuunerannut tunngasut, sulinerminni paasisatik, pillugit paasissutissanut tunngatillugu susassaqaanngitsunut piunasaqaatitaqanngitsumik nipangiussimasussaataitaanertik mianersuutissavaat. Pisussaaffik aamma ikiortinut sulianut ilisimasalinnut kiisalu kikkunnulluunniit allanut pisortanut isumaqatigiissuteqarnertik malillugu sulinerminni pissutsinik taamaattunik ilisimannilersunut, atuuppoq. Pisortani oqartussaasunut imaluunniit suliffeqarfimmut isumaqatigiissuteqartoqarsimappat, pisussaaffik tamarmiusunut, oqartussaasumi imaluunniit suliffeqarfimmi sulinerminni pissutsit matuma siuliani taaneqartut pillugit paasisaqartunut, atuuppoq.

Naammagittaalliorsinnaaneq aamma akileeqqusissutinut akerliliisarnerit

§ 41. Pisassarisaq Ilanngaassivimmi ilanngunneqarsimagaluartoq akilersinniarneqaraluartorlu, innuttaasup pisinnaatitaaffini tamaasa piginnaatitaaffiinnassavai, ilanngullugit pisassarisap eqqortuuneranut akerliliinissamut periarfissani nalinginnaasut.

Imm. 2. Akerliliissutit akiligassiisumut nassiunneqassapput.

Naammagittaalliuutit il.il. suliarinissaannik akiligassiisup pisussaaffii

§ 42. Akiligassinneqartup paasippagu akileeqqusissut nalunaarutigineqartoq eqqunngitsumik nalunaarutigineqarsimasoq, imaluunniit pisassarisap atuunna imaluunniit annertussusaa pissutissaqartumik nalornissutaasinnaappat, akiligassiisoq ingerlaannaq akileeqqusissutip Ilanngaassivimmit tunuartinnissaanut imaluunniit akiliutaasup utertinnissaanut, pisussaaffeqarpoq.

Imm. 2. Ilanngaassivik aqqutigalugu innutaasoq tunngavissaqaanngitsumik akiliisinneqarsimappat, akiligassiisup pissutsinik paasitinneqarneranit qaammatisiutit malillugit ullut 14-it piffissamut killissaliunneqartut iluanni akiligassiisup Ilanngaassivik aqqutigalugu innuttaasumut aningaasat annertunaarlugit akilersitani, utertissavai.

Imm. 3. Aningaasat piffissamut killiliussamit aalajangersarneqartumi imm. 2-mi allasimasumit kingusinnerusukkut utertinneqarpata, utertillugit akiliinissamut piffissamut killiliussamit qaammatip aallartinneri tamaasa ernialiussaq 0,5 procentinik annertussuseqartoq, qaammammut akilerneqassaaq. Ernialiussaq akiligassiisumit akilerneqassaaq.

§ 43. Akileraartarnermut ingerlatsiviup ilanngaassiviup ingerlanneqarnera pillugu suliassat suliarissavai.

Imm. 2. Akileraartarnermut ingerlatsivik akileeqqusissutit pillugit aalajangiisinnaanngilaq, ilanngullugit immikkoortortat pisassarisaasa atuunnerat imaluunniit aningaasartaasa annertussusaat il.il., pillugit. Akileraartarnermut ingerlatsiviup innuttaasut akileeqqusissut pillugu apeqqutaat imaluunniit naammagittaalliutaat oqartussaasumut imaluunniit suliffeqarfimmut akileeqqusissuteqarsimasumut, innersuuttassavai.

Imm. 3. Akileraartarnermut ingerlatsivik naliliiguni innuttaasoq ikiorneqarnissamik immikkut ittumik pisariaqartitsisoq, Akileraartarnermut ingerlatsiviup ataasiakkaatigut naliliinini malillugu oqartussaasoq imaluunniit suliffeqarfik akileeqqusissuteqartoq attaveqarfigninnaavaa.

Kapitali 10

Pineqaatissiissutit

§ 44. Kalaallit Nunaannut pinerluttulerinermut inatsimmi maleruagassat malillugit akiliisussanngortinneqarluni pineqaatissinneqarsinnaavoq piaarluni imaluunniit mianersuaalliorujussuarluni:

1) Ilanngaassivik aqqutigalugu innuttaasumut isertitanik a-nik § 4, imm. 1-imi pineqartunut ilaasunik akiliinngitsoq.

2) Inatsisartut inatsisaanni matumani § 4, imm. 3 imaluunniit aalajangersakkat Inatsisartut inatsisaat manna naaportorlugu aalajangersarneqartut malillugit peqqusissummik malinninngitsoq.

Imm. 2. Aalajangersakkat unioqqutinneqarnerat Kalaallit Nunaanni pinerluttulerinermut inatsit malillugu akiliisitsinissaq pineqaatissiissutaasinnaasoq, aalajangersakkani Inatsisartut inatsisaat manna naaportorlugu aalajangersagaasuni, aalajangerneqarsinnaavoq.

Imm. 3. Unioqqutitsisoq suliffeqarfiuppat, Namminersorlutik Oqartussanit, naalagaaffimmit, kommunimit imaluunniit kommunit ataatsimooqatigiiffiannit kommunalbestyrelsit aamma nunaqarfimmi aqutsisut il.il. pillugit Inatsisartut inatsisaanni pineqartunut ilaasunit, aktiaatileqatigiiffimmit, piginneqatigiilluni ingerlatseqatigiiffimmit, piginneqatigiiffimmit assigisaannilluunniit tamakkiisumik ilaannaasumilluunniit pigineqartoq, suliffeqarfik ilaalu ilanngullugit taamatut pinerluttulerinermi inatsisitigut akisussaasuutitsisoqarsinnaavoq. Taamaaqataanik unioqqutitsisoq tassaappat Namminersorlutik Oqartussat, kommuni imaluunniit kommunit ataatsimooqatigiiffiat kommunalbestyrelsit aamma nunaqarfimmi aqutsisut il.il. pillugit Inatsisartut inatsisaanni pineqartunut ilaasoq, tamanna aamma atuutissaaq.

Imm. 4. Imm. 1-3 malillugit suliassat Kalaallit Nunaanni Eqqartuussivimmi siullertut suliarinnittussami, suliakkiunneqassapput.

Imm. 5. Akiliisitsinerit, imm. 1-3 malillugit aalajangersarneqartut, Nunap karsianut tutsinneqassapput.

Kapitali 11

Atuutilerpera

§ 45. Naalakkersuisut Inatsisartut inatsisaata atuutilernissaanut piffissaq nalunaarummi aalajangersassavaat. Naalakkersuisut ilanngullugu Inatsisartut inatsisaata ilai piffissani assigiinngitsuni atuutilissasut, aalajangersaasinnaapput.

Imm. 2. Naalakkersuisut misiligutaasumik suliniuteqarnermut ilaatillugu inatsisip kommunip ataatsip arlallilluunniit sumiiffiannut atuutilernissaa aalajangersinnaavaat.

Namminersorlutik Oqartussat, ulloq xx.xx.2019

Kim Kielsen